

## PABLO REMBICUACHIA FILEMÓN UPE FILEMON

### *Pablo mahenduhasa Filemón upe*

<sup>1</sup> Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviquí apo āgua ereico. <sup>2</sup> Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviquí apo āgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. <sup>3</sup> Yande Ru Tūpa, yande Yar Jesucristo tombou oporovasasa, güeco tuprisa avei pēu.

### *Filemón poroaisusa iyavei Cristo rese iyeroyasa*

<sup>4</sup> Che niha, “Aviye ndeu” ahe yande Ru Tūpa upe che yeruresa pīpe nde rese yepi. <sup>5</sup> Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. <sup>6</sup> Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. <sup>7</sup> Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

*Pablo oporandu mbahe aviye vahe rese Onésimo upe nara*

<sup>8</sup> Sese yepe che aico Cristo apóstol nde cuai āgua viña. <sup>9-10</sup> Che rumo aporandu ndeu nde poroaisusa rese mbahe aviye vahe apo āgua co nde rembiguigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo

secoi che rahir nungar yande Yar reroyasa pìpe cohave che roquendasave.

<sup>11</sup> Aracaco co nde rembiguai secoise nde pìri, ãgüe ehi tãhi vahe secocuer ndeu viña. Cũritei rumo ãgüe ndehi iri chira oico ndeu, iyavei cheu no. <sup>12</sup> Amboyevi co imondo ndeu eipeve. Eipisi inungar-ra che itera viña. <sup>13</sup> Che aipota opita vaherã nde nungar tupri che pãtivii ãgua viña, co soquendapri vite che recose Jesucristo ñehengagüer sui. <sup>14</sup> Che rumo ndaipotai mbahe apo nde pihañemoñetasa cuaẽhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pìpe. <sup>15</sup> Aviyeteramo Onésimo oyepepi pucu raimi nde sui oyevi iri vaherã nde pìri nara. <sup>16</sup> Ndahe iri chira mbiguai tãhi. Ahe rumo aviye catu itera mbiguai güeco agüer sui. Esepia, yande rivri niha yande rembiaisu secoi cũritei. Che asaisu etepri iyavei nde eresaisu catu irira che sui. Ndererecoi chira ava nungar tãhi; erereco tuprira saisusa pìpe yande rivri nungar tupri ité yande Yar upe nara.

<sup>17</sup> Inungar nde rivri che rereco eve. ãgüe ere tupri aveira co mbia pisi. <sup>18</sup> Acoi oyapose mbahe ndeu, anise virocuase que mbahe nde sui, cheu emombehu. Che evocoyase amboepira ndeu. <sup>19</sup> Che Pablo, aicuachía che po pìpe ité seroya tupri ãgua, ahe co amboepira ndeu; che nde mbohesa pìpe sui ereroya yande Yar. Ipipe inungar ireve vahe ãgüe ere cheu. Che rumo, “Ndereve cheu” ndahei eté ndeu. <sup>20</sup> Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pìpe. Ipipe che mboviha catumi eve.

<sup>21</sup> Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. <sup>22</sup> Iyavei amoha Tũpa che renose vaherã che

roquendasa sui pe yeruresa pīpe che so ãgua eipeve pe repia. Sese emoingatumi avei che pītuhu ãgua.

*Mahenduhasa, porovasasa ipa vahe*

<sup>23</sup> Che ndugüer, Epafra, omondo omahenduhasa ndeu. Ahe avei soquendapri cohava yande Yar Jesucristo recocuer rese. <sup>24</sup> Iyavei Marcos, Aristarco, Demas, Lucas che ndugüer oporaviqui vahe Tūpa uve, ahe avei omondo omahenduhasa yuvireco ndeu.

<sup>25</sup> Yande Yar Jesucristo tape rovasa opacatu eipeve. Aipo rupive.

## Tüpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

